

PLATAFORMA NACIONAL CALIDAD A ENTREGA SU DI DOS RAPPORT NA GOBIERNO

Ayera tardi el a ser trata cu Gobierno

ORANJESTAD (AAN): Na despacho di Minister Presidente Mr. Henny Eman ayera tardi, a tuma lugar un reunion entre e comision cu ta forma e Plataforma Nacional Cali-

dad forma pa Joyce Bartels-Daal, Florencio Wernet, Tico Croes, Robert Croes, Diet Booi, Don Mansur Maarten van Romondt y Vivian Emergencia hunto cu Minister

Presidente Henny Eman y Minister Plenipotenciario na Hulanda, Mr. Mito Croes. E di dos rapport a keda cla dia 22 di December 1999 caminda e puntanan cu mas ta

resalta ta e aspecto di financiamiento di partidonan politico, cual ainda tin discusion riba ki metodo ta esun mas apropiado pa hiba e control aki. Na e momentonan aki e discusion aki tambe ta tumando

lugar na Hulanda y ainda no tin un indicacion of consensus cual punto tin cu escohe. E di dos punto cu a resalta ta e relato den cual Minister Mito Croes, a duna un splicacion riba e protocol di principio cu a keda acorda entre Gobierno y cinco sindicato.

Mr Mito Croes a duna un bista riba e puntanan cu tin di haber cu Rapport Calidad den e protocol cu e sindicatonan.

Minister Presidente a haci un apelacion riba e Plataforma Nacional di Calidad, pa keda un temporada mas pa di e forma aki por termina c'un analisis completo di diferente punto pendiente pa ehecuion di Rapport Calidad den su totalidad.

E proposicion aki a ser acepta pa e miembronan cu ta forma parti di e Plataforma Nacional.

Minister Presidente Eman a muestra su satisfaccion cu e tremendo labor desplega pa e Plataforma Nacional aki, cu ta dunando mas contenido na e proceso aki pa ehecuion di e rapport.

Cuerpo di Aduana ta aumenta entrada cu mas cu 9 Mion Florin

ORANJESTAD (AAN): Riba ultimo dia di aña Minister di Finanzas Tico Croes a haci su bishita anual na oficina di Aduana pa asina forma parti di celebracion di fin di aña y sende pagara di Aduana. Manera ta custumber Inspector di Aduana Leandro Bernadina a informa Minister Croes di e desaroyonan cu a tuma lugar den su departamento. Pa e departamento di Inspectie der Invoerrechten en Accijnzen, aña 1999 a sera cu un aumento considerabel di mas cu 9 mion Florin di entrada. E suma total di entradanan di Aduana ta monta te 204 mion Florin, 9 mion mas compara cu e entrada di aña 1998 di casi 195 mion Florin.

Entradanan di Aduana ta parti den loke cliente ta paga pa servicio (2,1 mion); huur di magazijn (21 mion); invoerrechten (98 mion); accijnzen bebidanan alcoholico distila (11 mion); accijnzen cerbez (19,8 mion); accijnzen cigar (10,4 mion); accijnzen azeta mineral (59,8 mion) y doorvoerzegel (3,1 mion).

Aunke cu Minister di Finanzas a opta pa un aumento di

entrada di 11 mion Florin el a expresa cu e ta satisfecho cu e bon trabao cu Aduana a haci den e aña cu a transcuri y cu e ta sigui conta riba e contribucion di e cuerpo di Aduana den e servicio pa nos comunidad.

E aña aki lo cuminsa cu introduccion di reformanan fiscal na unda e enfasis lo cay mas riba belasting indirecto, esta invoerrechten y accijnzen. Tambe lo cuminsa cu automatizacion di henter Belastingdienst, di cual Aduana tambe ta forma parti, pa asina por brinda un servicio mas eficiente y mihor na e cliente.

E ta afecta Zona Liber seriamente!

LEY NOBO DI DOUANE COLOMBIANO A SORPRENDE ARUBA

ORANJESTAD (AAN): E informe cu a caba di drenta manera un baño di awa friu, ta muestra cu Zona Liber di Aruba, Curaçao y di Panama ta den problemanan serio, despues cu Colombia a pasa ley na nobo pa Douane, cu ta drenta na vigor dia 1 di Juni 2000.

Ta trata aki di Decreto Number 2685, y especificamente Artículo 446 ta cay pisa pa Zona Liber di Aruba. E ta regarda e zona di regimen di Douane special di Maicao, Uribia y Manaure.

Artículo 446 ta prohibi estrictamente, importacion di e siguiente mercancia:

No mag importa vehiculo. No mag importa articulonan electrico domestico. No mag importa ningun licor. No mag importa ningun cigar.

Pues den proximo dianan, esaki lo bira un punto serio di conversacion, mirando e hecho cu Aruba ta exporta hopi di e productonan aki pa Colombia, y e ta afecta seriamente e futuro di Zona Liber di Aruba, como tambe esun di Curaçao.

Hopi cachospanta na Animal Shelter

ORANJESTAD (AAN): Diferente persona responsable, a haci entrega di diferente cacho na e lugar di Animal Shelter.

Pues, hendenan na Aruba cu a perde nan cacho den temporada di claphi, por pasa na Animal Shelter.

Actua rapido, pasobra otro siman tur cacho ta pa vende.

